

BOSNA I HERCEGOVINA  
Federacija Bosne i Hercegovine  
Tuzlanski kanton  
OPĆINA GRAČANICA  
OPĆINSKO VIJEĆE

Broj predmeta: 01-05-00699-2013  
Broj akta: 01EH-001  
Gračanica, 27. 02. 2013. godine

Z A P I S N I K  
SA 4. SJEDNICE OPĆINSKOG VIJEĆA  
GRAČANICA

Održane dana 31. 01. 2013. godine u sali za sjednice Općine Gračanica, sa početkom u 12.00 sati.

Početu sjednice prisustvovalo je 29 članova Općinskog vijeća Gračanica. Odsutan je bio Selimović Senad.

Sjednicu je otvorio i istom predsjedavao Ibrišević Edin, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali i: Općinski načelnik Nusret Helić, šefovi službi za upravu, Senaida Šaković, Aida Hodžić, Zijad Dedić i Mustafa Bajić, općinski pravobranilac Jasminka Imširović, poslanik u Skupštini TK Džemal Jukan, predstavnik OSCE-a Slobodanka Radić, član Etičke komisije Larisa Šuša, izvjestioci po pojedinim tačkama dnevnog reda, načelnik Policijske uprave Omer Halilčević, komandir Policijske stanice Safet Ibrahimović, te predstavnici sredstava informisanja.

Zapisnik sa 3. sjednice Općinskog vijeća Gračanica usvojen je jednoglasno, bez primjedbi sa 29 glasova "ZA".

Pitanja i inicijative kandidovali su sljedeći članovi Vijeća:

Fadil Mešić:

"Ja imam kratko pitanje za direktora Elektrodistribucije. Već više od mjesec dana u ulici Sarajevska ne radi niti jedna sijalica. S obzirom da se iz Škole vraćaju djeca, jer je krenula školska godina, da pojasnite zašto ne radi. Oni bi bili zadovoljni čak i da radi svaka druga sijalica, kako sam zaključio iz razgovora s njima."

Nihad Krajnović:

"Ja upućujem vijećničku inicijativu za donošenje općinske odluke za naplatu prekršaja parkiranja motornih vozila na trotoare, pješačke prolaze, staze i zelene površine.

Obrazloženje: Obzirom na sve učestalije reakcije građana i probleme sa kojima se već izvjesno vrijeme susreću pješaci, među njima najčešće učenici osnovnih i srednjih škola, mlade majke s djecom u kolicima, penzioneri, upućujem inicijativu za donošenje općinske odluke o bezbjednosti saobraćaja na općini Gračanica koja bi zamijenila federalni član Zakona o osnovama bezbjednosti saobraćaja koji je ukinut, nemarom ili namjerno, nije mi cilj da istražujem. Ovom odlukom ispravili bi se svi nedostaci ili nedorečenosti federalnog Zakona zbog kojih policajci nisu u prilici kazniti vozače koji parkiraju vozila na već pomenutim površinama. Cilj je urediti haotično stanje u pogledu parkiranja vozila u gradu u kojem su pješaci primorani da se umjesto trotoarom kreću kolovozom. Primjera je bezbroj: trotoar kod Elektroposlovnice, Konzuma, Osnovne škole "Hasan Kikić", zgrade Kifla. Obzirom da tako predviđa Zakon, sva naplaćena sredstva od ove vrste prekršaja išla bi u korist budžeta Općine Gračanica, a koja bi se mogla utršiti na bolju vertikalnu i

horizontalnu signalizaciju te sigurnost pješaka učesnika u saobraćaju. U prilog ovome ide i činjenica da su na novim Obavijestima o učinjenom prekršaju ostavljene mogućnosti kažnjavanja prekršitelja po općinskoj odluci.”

Almedin Devedžić:

“Ja bih samo kratko da se dotaknem prethodnih mojih inicijativa, odnosno pitanja s prethodnog Vijeća održanog u decembru mjesecu, vezano za sanaciju divlje deponije smeća na lokalitetu Sedra na putu Malešići-Lukavica. Obzirom da sam zamolio načelnika da preduzme određene radnje na hitnom saniranju postojeće deponije, koja prijeti izvoru vode kojom se snabdijevaju dvije mahale u Lukavici, i da sam tražio pismeni odgovor da vidimo u kakvom je to stanju i na koji način djelovati u okviru njenog otklanjanja i obzirom da do ovog trenutka nisam dobio pismeni odgovor, nadam se evo da će tokom Vijeća načelnik dati određena pojašnjenja o preduzetim radnjama. Koristim priliku da uputim još jednu dodatnu inicijativu, odnosno zahtjev za hitno uklanjanje divlje deponije smeća u MZ-i Lukavica, odnosno da ponovim isto sa prethodne sjednice Vijeća. Upućujem ovo komunalnom inspektor Općine Gračanica. Obzirom da smo se i prethodne sjednice kolegica Selihana i ja obraćali načelniku kako bi alarmirao nadležne službe s ciljem hitnog uklanjanja deponije smeća u području izvorišta Sedra u MZ-i Lukavica, zaseoci Prnjavor i Bijeli Potok, pa kako nismo dobili nikakav odgovor obraćamo se direktno komunalnom inspektor Općine Gračanica da izađe na ovo zagađeno područje, ako već nije, i preduzme sve zakonom predviđene radnje čiji je cilj hitna zabrana daljeg deponovanja smeća i sačinjavanja plana njene sanacije u što kraćem roku. Napominjem da je ovaj zahtjev popraćen peticijom građana i prpratnim slikama deponije, a za sljedeću sjednicu Vijeća tražim pismeni odgovor o preduzetim radnjama.”

Mirsad Čamdžić:

“Jedna mala tehnička zamjerka predsjedavajućem. Mislio sam da će prije davanja vijećničkih pitanja biti komentari vijećničkih pitanja sa prošle sjednice. Ali evo zato ću iskoristiti ovu priliku i samo da kažem da sam na prošloj sjednici Općinskog vijeća postavio dva pitanja, odnosno inicijative. Prva inicijativa je bila da se redovne sjednice Općinskog vijeća održavaju subotom u fiksnom terminu kako bi pojedini vijećnici lakše dobili slobodno vrijeme u preduzeću u kojem rade. Kad evo odbijena je ova inicijativa. Dobio sam odgovor od Općinskog načelnika s kojim se u prvom dijelu ja u potpunosti mogu složiti. Međutim, radi se o inicijativi da se na parking ispred zgrade Općine obilježe dva parking mjesta za gračaničke privrednike. I sa prvim dijelom u vezi s tim se slažem, ali zadnje dvije rečenice su, kako god da se definišu parkinga neće biti na način da se ostave dva ili više parkinga za privrednike, doktore ili neke druge jer smo pred zakonom svi jednaki i trebamo imati jednaka prava. Naša stranka je posebno osjetljiva na ove segregacije i naravno da nam namjera nije bila nikakva da segregiramo nekoga pred zakonom. Znamo mi da smo svi jednaki, nego smo uputili inicijativu samo za to kako bi uputili jednu vrstu poruke gračaničkim privrednicima da se i na taj način, između ostalog, misli na njih i ovaj ambijent. Toliko o ovom komentaru i za kraj jedna inicijativa, tačnije jedan prenos pisma od grupe vlasnika malih radnji kojeg sam dobio. Naša stranka kao politički subjekt zamoljena je da ovo prenese Općinskom vijeću Gračanica i glasi:

- Poštovana gospodo,

Obraćamo vam se sa zahtjevom za uređenje ulice Ahmet-paše Budimlije, prolaz kroz haustor do pijace. Ulica je duga 70 koraka, tu su od 1985. godine smješteni objekti ćevabdžinica Junuzović, apoteka Ćerimagić, obućar, Mehinović, Cvjećara A, veterinarska apoteka, Butik vjenčanica. Ovih 28 godina niko ništa nije uradio osim nas, poreznih obveznika koji su nasipali rizlu o svom trošku. Najmanja kiša ulicu čini blatnjavaom i punom bara. Komus u ovoj ulici bespravno prodaje pijačna mjesta ispred naših objekata, jer to je javna a ne površina Komusa. Napominjemo, svi imamo ugovore sa Komusom o odvozu smeća i dobijamo redovno račune koji su navodno i za uređenje površine. Također, plaćamo i komunalnu taksu. Naglašavamo da smo vlasnici zemljišta na kojem su objekti, Bili bismo sretni da se uradi udvod površinskih voda i izvrši nasipanje, a o asfaltu sanjamo 28 godina.

Unaprijed zahvalni uz molbu da nam pismeno odgovorite-.”

Hasan Puškar:

“Ja imam jednu inicijativu koja je vezana za inicijativu kolege Krajinovića, a to je da se pri Općinskom vijeću osnuje Komisija za bezbjednost saobraćaja. Naime, proteklih dana smo imali nekoliko sastanaka na Kantonu kao udruženje auto škola i ostala udruženja koja se bave edukacijom vozača i koja su vezana za saobraćaj i utvrdio sam da u većini općina ima komisija za bezbjednost saobraćaja. Znači ovom prilikom ja bih pokrenuo inicijativu da se za sljedeću sjednicu pripremi materijal s tim da ja mislim da je ovo direktan posao kolega te komisije koja bi trebala imati svoje mišljenje itd.”

Edin Ibrišević:

“Imam jedno pitanje koje upućujem nadležnim za odlaganje komunalnog otpada na općini Gračanica. Pitanje glasi:

- S obzirom da je gradska deponija postala odavno neuslovna za odlaganje komunalnog otpada i da narušava ekološke standarde naše zajednice, s tim u vezi interesuje me, kao i većinu građana naše općine, da li postoje aktivnosti na rješavanju ovog problema i koje su to aktivnosti?”

Pošto više nije bilo prijavljenih članova Vijeća za kandidovanje pitanja i inicijativa za riječ se javio Gazibegović Sead i kao direktor Elektroposlovnice Gračanica odgovorio na pitanje Mešić Fadila:

“Samo kolegi da kažem da javna rasvjeta nije u nadležnosti Elektrodistribucije.”

Za riječ se javio i Općinski načelnik Nusret Helić, te dao sljedeće obrazloženje:

“Evo da odgovorim na jedno od ovih pitanja ili možda dva. Kad je u pitanju Lukavica mi smo preduzeli sve, izašla je ekipa iz Komusa, inspektori, snimili stanje deponije. To je jedna velika jaruga, nepristupačna za bilo kakve mašine. Procijenjeno je da imaju ogromne količine smeća. Vrijednost sanacije deponije je negdje oko 20.000,00 KM i moguće je samo ručno nešto na tome raditi, dakle fizički izvoziti smeće. Valja nam dakle naći 20.000,00 KM, vidjeti kako to. U budžetu nema tih sredstava. Uglavnom snimljeno je i mi ćemo u tom smislu tražiti od građana, jer su smeće bacili građani i tražit ćemo na koji način da zajedno saniramo deponiju jer je jedna od specijalnih deponija. To je upravo tamo gdje je jedno od izvorišta, čini mi se Sedra, kako se već zove. Snimljeno je do detalja, ostaje sad da tražimo sredstva. Mi ćemo to kandidovati i prema fondu okoliša, pa ako bude sreće da dobijemo lakše ćemo završiti. Ovo što je Čamdžić spominjao, prolaz za pijacu. Budžet smo usvojili prije mjesec dana. Svi ovakvi prijedlozi se daju tamo pred rebalans budžeta ili do usvajanja budžeta. Sve što nije u budžetu nije moguće sada rješavati. Dakle, voljeli smo da je to bilo predloženo pred budžet, ali evo imat ćemo to u vidu kod rebalansa budžeta. Sve što možemo uraditi jeste da ćemo poslati ekipu, snimiti koliko to košta pa da onda znamo kako dalje. Javna rasvjeta, nije samo problem ove sijalice, jer se desi u deset dana da ne gori po trideset sijalica. Evo u gradu je već potrošeno 3.000,00 KM od Nove godine za zamjene sijalica za javnu rasvjetu da znate. Ovo je jedna vjerovatno pregorila nisu na vrijeme uočili i valja to zamijeniti.”

Predsjedavajući Vijeća Edin Ibrišević je otvorio raspravu o predloženom dnevnom redu 4. sjednice Općinskog vijeća Gračanica.

Nije bilo učesnika u diskusiji i dnevni red za 4. sjednicu usvojen je jednoglasno sa 29 glasova “ZA” i glasi:

1. ODLUKA O PROGLAŠENJU REZULTATA IZBORA ZA VIJEĆA MJESNIH ZAJEDNICA NA PODRUČJU OPĆINE GRAČANICA

Izvjestilac: Edin Ibrišević, predsjedavajući Općinskog vijeća

2. IZVJEŠTAJ O RADU I REALIZACIJI PROGRAMA RADA OPĆINSKOG NAČELNIKA ZA 2012. GODINU

Izvjestilac: Nusret Helić, Općinski načelnik

3. PLAN ZAŠTITE OD POŽARA ZA PODRUČJE OPĆINE GRAČANICA

Izvjestilac: Bajić Mustafa, šef Službe

4. INFORMACIJA O STANJU BEZBJEDNOSTI NA PODRUČJU POLICIJSKE STANICE GRAČANICA ZA 2012. GODINU  
Izvjestilac: Omer Halilčević, načelnik Policijske uprave
5. INFORMACIJA O IMPLEMENTACIJI STRATEGIJE ZA MLADE OPĆINE GRAČANICA 2010. – 2012. GODINE  
Izvjestilac: Mirza Hodžić, savjetnik načelnika za mlade
6. INFORMACIJA O PROSTORNOM PLANU OPĆINE GRAČANICA  
Izvjestilac: Aida Hodžić, šef Službe
7. INFORMACIJA O UPRAVNOM RJEŠAVANJU PREDMETA U SLUŽBAMA ZA UPRAVU OPĆINE GRAČANICA U 2012. GODINI  
Izvjestilac: Šaković Senaida, šef Službe
8. RJEŠENJA I ZAKLJUČCI IMOVINSKO-PRAVNE SLUŽBE  
Izvjestilac: Aida Hodžić, šef Službe

### **TAČKA 1:**

#### **ODLUKA O PROGLAŠENJU REZULTATA IZBORA ZA VIJEĆA MJESNIH ZAJEDNICA NA PODRUČJU OPĆINE GRAČANICA**

Uvodno obrazloženje po prvoj tački dnevnog reda dao je predsjedavajući Općinskog vijeća Edin Ibrišević:

„Prema odluci vijeća sa prethodne sjednice imenovana je komisija za sprovođenje izbora u mjesnim zajednicama. Komisija je izvršila potrebne pripreme i sprovela izbore u nedjelju 27. januara. Zborovi građana su započeli u 14 h . Od 23 mjesne zajednice potrebni kvorum od 5 % je skupljen u 21 mjesnoj zajednici. Potrebno kvoruma nije bilo u najvećoj mjesnoj zajednici Gračanica gdje je na glasanje izašlo 316 građana ili 2.63 % biračkog tijela i u Lukavici gdje je na glasanje izašlo 100 građana ili 3.77 %. Najveća izlaznost je zabilježena u mjesnim zajednicama sa manjim brojem stanovnika, pa je tako u Lendićima izlaznost bila 35 %, u Buku 31.8 % i u Gornjoj Lohinji 24.6 %. Najveći broj građana prema važećim rezultatima je izašao u Donjoj Orahovici gdje su glasala 274 građanina. Kada su u pitanju pojedinačni rezultati, gledano procentualno, najveći rezultat je ostvarila Iljazović Senada koja je zadobila podršku od 27.1 % kompletnog biračkog tijela u svojoj mjesnoj zajednici. Gledano brojčano najviše glasova su osvojili Vehid Osmanović, Ibrahim Hasić i Amir Dedić koji su osvojili po 96 glasova u svojim mjesnim zajednicama. Na izbore za vijeća mjesnih zajednica na području općine Gračanica ukupno je izašlo 2 618 građana. U mjesnim zajednicama Gračanica i Lukavica izbori će biti ponovljeni sukladno statutu općine Gračanica. Nadam se da ćemo danas usvojiti ovu odluku te omogućiti dalji nesmetan rad novih saziva vijeća mjesnih zajednica na području općine Gračanica.“

U diskusiji po ovoj tački dnevnog reda učestvovali su:

Hasan Fehratović, kao predsjednik Komisije za propise i Statut, izbor i imenovanje, općinska priznanja i obilježavanje značajnih događaja i ličnosti, iznio je sljedeće:

„Kada je u pitanju ova odluka Komisija za propise i Statut nije imala posebnih primjedbi osim da se na sjednici razgovaralo o mogućoj inicijativi, naravno o čemu treba da se izjasni i Općinsko vijeće. Nisam rekao na današnjoj sjednici, možda na nekoj od narednih, da se pristupi inicijativi za donošenje Odluke o pristupanju izmjenama i dopunama Statuta Općine, upravo u pogledu mjesne samouprave jer se ispostavilo da prilikom primjene ovih novih odredbi Statuta bilo je određenih manjkavosti i komplikacija, nedostataka kada su u pitanju izbori za vijeća mjesnih zajednica. Evo prije svega to se odnosi na potrebni kvorum, način održavanja zбора građana itd.

Dakle, nismo mi donijeli nikakav zvaničan stav ali evo prenosim da se, između ostalog, razmišlja i o toj inicijativi.“

Hasan Puškar:

„Klub vijećnika SDA će podržati ovu odluku uz nekoliko primjedbi. A to je, primjedba broj jedan ovo što je predsjednik Komisije za propise i Statut iznio i volio bih da se o ovoj inicijativi izjasni Vijeće. Znači da se za sljedeću sjednicu pripremi i donese Odluka o pokretanju izmjene Statuta Općine Gračanica. Obrazloženje bi moglo biti sljedeće. Sada kada bi neko počeo ulagati prigovore na izbore koji su se održali proteklog vikenda u većini mjesnih zajednica rezultati ne bi bili validni. Sto posto, jer u većini mjesnih zajednica prilikom otvaranja izbora nije bilo 5% na zboru građana. Znači, trebalo bi u Statutu to da se promijeni, tako da ja predlažem ispred kluba da se pokrene inicijativa, da se izmijeni da ne bude više zbor građana, nego da budu izbori, da se odredi vrijeme i ostali uslovi. To neka pripremi neko radno tijelo i materijal dostavi na Vijeće. Znači Klub vijećnika SDA podržava ovu odluku uz pomenutu inicijativu, da se da na glasanje.“

Za riječ se javio Općinski načelnik Nusret Helić i iznio sljedeće:

„Evo samo vezano za ovu inicijativu, ja bih zamolio da se o njoj danas ne raspravlja jer u toku je aktivnost na promjeni Zakona o lokalnoj samoupravi, posebno sa aspekta mjesne samouprave. Ja sam jedan od članova radne grupe Federalnog ministarstva. Očekuje se možda sredinom godine da će ugledati svjetlo Zakon o principima lokalne samouprave gdje je posebno fokusirano jačanje mjesne samouprave, oko prihoda, oko drugačije uloge, veće uloge donošenja nekih odluka pa da to ostavimo, imamo vremena dok se to reguliše, pa ćemo morati uskladiti Statut s time, zbog čega ovo i govorim.“

Hasan Puškar je ne izlazeći za govornicu povukao predloženu inicijativu.

Odluka o proglašenju rezultata izbora za vijeća mjesnih zajednica na području općine Gračanica usvojena je jednoglasno sa 29 glasova „ZA“.

## **TAČKA 2:**

### **IZVJEŠTAJ O RADU I REALIZACIJI PROGRAMA RADA OPĆINSKOG NAČELNIKA ZA 2012. GODINU**

Uvodno obrazloženje u kratkim crtama dao je Općinski načelnik Nusret Helić:

“Poštovani predsjedavajući, uvaženi vijećnici, gosti i mediji, mislim da ima potrebe da se kaže par riječi. Sve vas skupa pozdravljam i želim uspješan rad na našoj sjednici.

Izveštaj o radu i realizaciji programa rada Općinskog načelnika ste dobili i nadam se da ste ga uspjeli pogledati. Ako i niste nije problem, jer vjerujem da ste rad načelnika i službi mogli pratiti čitavu godinu i putem medija i neposredno, a neke smo poslove radili zajedno (mislim na vijećnike koji su bili u ranijem sazivu Općinskog vijeća).

Ovaj Izveštaj ima nešto drugačiju formu jer sam želio da se iz njega vidi i rad pojedinih službi čiji se izvještaji ne razmatraju na Općinskom vijeću, a kojim rukovodi Općinski načelnik, kao nosilac izvršne vlasti.

Moja je ocjena, ne znam hoćete li se i vi složiti da je prošla godina, bez obzira na sve ekonomske teškoće, smanjene prihode i druge probleme bila uspješna i da smo mi svoje planirane aktivnosti, gotovo u cjelosti izvršili. Logično, da je tu i podrška Vijeća bila značajna.

Bila je to godina realizacije krupnih projekata - pokrivena je sportska dvorana na Bazenu, završena dionica Regionalnog puta do iza Bolnice, veći dio radova na mostu kod Šumarije, asfaltirane tri ključne saobraćajnice u gradu (Lipa, Hajdarevac i Bosanskih kraljeva), asfaltirana dionica puta Javor-Lendići, putevi u Gornjoj Orahovici, Babićima, Donjoj Orahovici, Prijekom Brdu, Lukavici i Doborovcima, završeni bazeni za vodu u Donjoj Lohinji i Vranovićima, pronađene nove količine vode u Donjoj Orahovici, završena škola u Pribavi, Doborovcima, nastavljena regulacija Sokoluše i da ne nabrajam više.

Uspješno smo organizovali i treći sajam poduzetništva „Grapos-expo“, obradili blizu 500 rješenja za poticaje za poljoprivredne proizvođače kojim je odobreno 850.000 KM, realizovali poticaj iz općinskog budžeta za pčelare, plastenike i dijelove za poljoprivredne mašine, podigli efikasnost organa uprave i javnog sektora, nastavili sa deminiranjem prioriternih lokacija i saniranjem prioriternih klizišta. Obezbijedili budžetska sredstva za finansiranje sporta, programa nevladinog sektora i drugih korisnika budžeta, nastavili dobru saradnju sa bratskim gradovima (dobili i novi bratimljeni grad Laterina iz Italije). Ostvarili dobru komunikaciju sa međunarodnim organizacijama, nevladinim sektorom i građanima.

I pored svih teškoća završili smo godinu bez budžetskog deficita.

Još jednom naglašavam da bi to sve bilo teže da nije bilo podrške saradnika i Općinskog vijeća. Hvala!”

U diskusiji po drugoj tački dnevnog reda učestvovali su:

Rahim Gadžić:

“Klub vijećnika SDA je razmatrao Izvještaj o radu i realizaciji Programa rada Općinskog načelnika za 2012. godinu. Pošto Izvještaj o radu i Program rada Općinskog načelnika za 2012. godinu je usko vezan sa budžetom Općine Gračanica za 2012. godinu, SDA je u protekloj godini imala niz amandmana i primjedbi vezano za budžet Općine Gračanica za 2012. godinu i normalno to prošla parlamentarna većina nije uvažila ništa od naših primjedbi, znamo i kad smo usvajali budžet i rebalans budžeta za 2012. godinu. Klub SDA pokušao je da i u rebalans budžeta, ne ulaze nove stavke i novi troškovi, nego da se unutar budžeta kreću troškovi. Međutim, i u tom momentu je nova parlamentarna većina preglasala nas i ponovo usvojili rebalans budžeta, a nisu se kretali unutar usvojenog budžeta za 2012. godine. Znajući sve to da su se pojavili novi projekti, projekti u 2012. godine nisu bili u budžetu na rebalansu budžeta, znajući da neke stavke u budžetu nisu uopšte realizovane, znajući da su i VMZ-a gdje se odvija život općine Gračanica uskraćena za redovna finansiranja jer su najmanja sredstva i oko 20% su umanjena i niz tih još stvari koje su se desile u budžetu za 2012. godinu. SDA iz svih ovih razloga koje smo kazali kad je u pitanju Izvještaj o radu i realizaciji Programa rada Općinskog načelnika neće ga podržati i mi ćemo ostati protiv ovog izvještaja.”

Safet Pjanić:

“Pozdravljam sve prisutne i dat ću komentar na Izvještaj o radu Općinskog načelnika. Mislim da moramo biti svjesni situacije u kojoj se radilo u prošloj godini, znači koja je bila vrlo krizna i vrlo teška, kad je u pitanju budžet i njegova realizacija i samim tim što budžet nije doživio deficit treba itekako odati priznanje zaista i načelniku, a rekao je i sam i podršci Općinskog vijeća. Ja znam da se raspravlja o Izvještaju o radu o poslovanju bilo kog privrednog subjekta nije lako zaista proći to sve, tu cijelu godinu ta turbulentna kretanja su zaista prisutna i onda mislim da ovo treba cijeniti. Treba cijeniti uloženi trud i rad i ja kao član kluba BPS-a dajem punu podršku ovom izvještaju, mada nisam bio član u prošlom sazivu Vijeća, ali znam situaciju u kojoj se sve to događalo i naravno da će BPS podržati ovaj izvještaj.”

Pošto nije bilo više učesnika u diskusiji prešlo se na izjašnjavanje.

Izvještaj o radu i realizaciji Programa rada Općinskog načelnika usvojen je sa 19 glasova “ZA” i 10 “PROTIV”.

### **TAČKA 3:**

#### **PLAN ZAŠTITE OD POŽARA ZA PODRUČJE OPĆINE GRAČANICA**

Obrazloženje po tački 3. dnevnog reda dao je Mustafa Bajić, šef Službe za civilnu zaštitu:

„Plan zaštite od požara je osnovni dokument u kojem se utvrđuje ukupna organizacija zaštite od požara na području općine, određuje način finansiranja zaštite od požara, određuju zadaci svih subjekata zaštite od požara i utvrđuju kadrovske materijalne i finansijske potrebe za realizaciju zadataka utvrđenih u planu. Planom se definišu sva krupna i veoma važna pitanja jer spadaju u

oblast planiranja te predstavljaju materiju o kojoj moraju odlučivati najviši organi vlasti. Prema tome, može se konstatovati da plan zaštite od požara općine ima tri osnovne karakteristike:

- prvo, ima element normativnog akta, jer se njime utvrđuje politika i ciljevi zaštite od požara u općini, utvrđuje ukupna organizacija i planiraju, kadrovski, materijalni i finansijski i drugi uslovi potrebni za realizaciju utvrđenih zadataka,

- drugo, ima elemente operativnog dokumenta i

- treće, ima obavezujuću snagu, koja je utvrđena u članu 23. Zakona.

Osnove i polazište za izradu plana zaštite od požara su:

- prvo, Procjena ugroženosti od požara (usvojena od strane Općinskog načelnika Gračanica, zaključak broj: 02-44-276/12 od 19.01.2012. godine,

- drugo, kadrovski, materijalni, finansijski i drugi uslovi koj su značajni za zaštitu od požara.

Plan zaštite od požara općine Gračanica izrađen je po metodologiji koja je propisana Uredbom o sadržaju i načinu izrade planova zaštite i spašavanja od prirodnih i drugih nesreća i planova zaštite od požara («Službene novine FBiH», broj: 8/11).“

Učesnici u diskusiji po ovoj tački dnevnog reda su:

Hasan Puškar:

„Ispred Kluba SDA imam nekoliko konkretnih pitanja pa bih Vas molio da odgovorite. A pitanje su inicirali neki požari. Npr. šta ste konkretno uradili na nekom vodozahvatu ili šta planirate? Gdje ste se konkretno uključili kao civilna zaštita u izgradnju vodovodne mreže? Akcenat je, pošto se sad iz budžeta finansiraju većina vodovoda. Ja koliko znam nigdje nikad civilna zaštita ili vatrogasna jedinica nije sugerisala izgradnju hidrantske mreže ili hidranta. Ni sa jednim vijećem ili predsjednikom VMZ-e, sad idem gore van grada, nikad niko nije stupio u kontakt da se konsultuje gdje ima hidrant izgrađen, gdje se može u slučaju požara pripočeti da se pune cisterne itd. Mi smo u Sokolu imali dva slučaja. Jedan slučaj kad je mlin bio pod požarom gdje su cisterne išle u Gračanicu i punile se vodom, a imali su 200 metara od požara hidarant. Znači to je pitanje, a sljedeće pitanje je. Nabrojali ste neke objekte od značaja, ali nisam nigdje vidio da ste sugerisali da je označen neki požarni put, pristup objektima itd. Pa molim Vas, ako može da odgovorite na ta pitanja. I pokrećemo inicijativu sa ovog mjesta da se u svim mjesnim zajednicama, gdje nisu izgrađeni hidranti ili hidrantska mreža da se sugerije izgradnja, a da to pod obavezno bude u narednom periodu gdje se izgrađuju novi vodovodi. To da bude znači obaveza, izgradnja hidrantske mreže .“

Mustafa Bajić je odgovorio:

„Ja uvažavam inicijative gospodina Puškara, međutim vjerovatno nije dobro iščitao ovaj plan. U njemu stoji lijepo. Postoji Pravilnik o hidrantskoj mreži. Znači, prilikom projektovanja vodovoda obaveza investitora, odnosno obaveza projektanta je da projektuje i hidrantsku mrežu. Tako da ima, između ostalog, u Planu i prijedlozi da se prilikom same rekonstrukcije i novog projektovanja vodovodne mreže, obaveza je da se ispoštuje i pravilnik o hidrantskoj mreži i da se projektuju hidranti po svim mjesnim zajednicama. Vidjeli ste tamo u onim opertivnim planovima gdje stoji tamo u dijelu gdje „Vodovod i kanalizacija“ su nadležni da izvrše opravku, odnosno uređuje hidrantske mreže u samam gradu. To je zakon tako regulisao i tako treba da se uradi. Požarni putevi. Niste pročitali znači, najodgovorniji za oblast zaštite od požara je vlasnik objekta, direktor preduzeća, općinski načelnik za Općinu i svi smo mi odgovorni za oblast zaštite od požara. Požarne puteve će projektovati, znači u okviru preduzeća svako pravno lice je obavezno da uradi svoj Plan zaštite od požara. I na osnovu procjene ugroženosti on utvrđuje znači požarne puteve i mjere zaštite od požara organizacije zaštite od požara u pravnom licu. Mi smo ovdje iskazali preduzeća koja smatramo da su posebno ugrožena sa aspekta zaštite od požara, tako da u tom dijelu su nabrojana odgovarajuća preduzća, a isto tako je rečeno da će se najmanje jedan put godišnje vršiti ažuriranje tih planova zaštite od požara. Znači, na osnovu ovog Plana zaštite od požara sva preduzeća i pravna lica bit će obavezna da donesu svoje procjene ugroženosti od požara i svoje planove o zaštiti od požara.“

Hasan Puškar je replicirao:

„Čini mi se načelniče da sam rekao inicijativa da se pokreće, a drugo, jeste li igdje, to sam pitao učestvovali u izgradnji, da odete negdje u kontrolu da se sa nekim konsultujete, niste sto posto. Znači to kažem ja odgovorno da niste. Ima znači u projektu, je li iko provjerio po tom gdje idu državne pare. Je li iko provjerio je li igdje izgrađen hidrant? Nije. I gotovo nigdje se ne izgrađuje hidrant, u projektu ima, ja kažem, jedno je slovo na papiru. Drugo, svi privatni subjekti su natjerani da urade požarne puteve i hidrante. Hajde da obiđemo javne ustanove, škole, Općinski sud. Prvo to da obiđemo. Bit će ali kada. Privatni subjekti, nema tehničkog prijema bez odgovaranjice to ja znam i svi znamo iz ličnog iskustva. Ja kažem za javne ustanove. Evo ovdje neka pođe gorit, gdje vam je hidrant vani. Ima jedan, a kako pravilnik kaže. Mora biti jedan na 10-15 metara drugi. Ja ovdje govorim evo kod Općine i ustanova, gdje imaju, ako imaju, to je priključak na jedan ili pola cola, a treba biti najmanje 70. Znači pokrećem inicijativu da Vatrogasna jedinica u svim mjesnim zajednicama naredi da se izgrade hidrantske mreže. To je što smo poučeni iskustvom kod požara što su u Sokolu bili. Pogotovo što dolazi ljetni period kad se većina požara dešava, gdje treba vidjeti gdje su hidranti da se pune cisterne i brže da se interveniše.“

Mustafa Bajić je ponovo naglasio:

„Obaveza vlasnika, pravnih lica je da dostavlja redovno izvještaj Vatrogasnoj jedinici o stanju hidrantske mreže. I obaveza pravnog lica, znači kad kažem pravno lice, tu su i subjekti i javne institucije, da svakih šest mjeseci se vrši servisiranje hidrantske mreže i da se na bazi toga dostavljaju informacije Vatrogasnoj jedinici koja interveniše na terenu. I najlogičnije je da svaka mjesna zajednica, a mi smo u ovom Planu rekli, odnosno predložili, a inspektori su ti koji vrše nadzor. Znači Kantonalna inspekcija vrši nadzor, oblast zaštite od požara i oni će narediti, sve ondje gdje je Planom zaštite od požara predviđena hidrantska mreža, oni će narediti da se mora na vrijeme ispitivati i dostaviti izvještaj Vatrogasnoj jedinici itd. I nama je interes da Vatrogasna jedinica ima sredstva za gašenje u svim mjesnim zajednicama i logično je da će biti bolja i uspješnija intervencija.“

Prešlo se na izjašnjavanje i Plan zaštite od požara za područje općine Gračanica je usvojen jednoglasno sa 29 glasova „ZA“.

#### **TAČKA 4:**

##### **INFORMACIJA O STANJU BEZBJEDNOSTI NA PODRUČJU POLICIJSKE STANICE GRAČANICA ZA 2012. GODINU**

Uvodno obrazloženje je dao Safet Ibrahimović, komandir Policijske stanice Gračanica.

„Policijska stanica je sačinila Informaciju prema Općinskom vijeću u kojoj su taksativno dati podaci o radu Policijske stanice. Znači to su numerisane brojke koje govore o stanju ukupne bezbjednosti po pojedinim segmentima. Ta bezbjednosna situacija na području općine Gračanica u 2012. godini sa stanovišta te ukupne bezbjednosti i onoga što je Policijska stanica upoznata i raspolaže prijavama i podacima, ocjena je kao povoljnijom u odnosu na prethodnu godinu što to i vidimo iz statističkih pokazatelja. Ova tvrdnja se može potkrijepiti činjenicom da je Policijska stanica Gračanica ostvarila zacrtane ciljeve uprave policije Ministarstva unutrašnjih poslova TK za 2012. godinu, gdje je ostvareno povoljnije stanje opće sigurnosti u zoni odgovornosti Policijske stanice Gračanica. Smanjen je broj prijavljenih krivičnih djela za 13,70% što jeste dio osnovni programski cilj Ministarstva. Smanjen je broj saobraćajnih nezgoda za 28,03%. Broj poginulih takođe za jedan, obzirom da smo u 2011. godini imali tri poginula, u 2012. godini dva poginula u saobraćajnoj nezgodi, što je takođe cilj Strategije o bezbjednosti saobraćaja BiH. Smanjen je broj stvarno izvršenih prekršaja po javnom redu i miru, za 17 prekršaja, iako statistički pokazatelji o broju podnesenih izvještaja prema sudu govore da je broj prekršaja povećan što je razlog što se jedan dio prekršaja prenio iz prošle godine zbog određenih proceduralnih razloga. Unaprijeđen je stepen efikasnosti policije zahvaljujući blagovremenim usmjeravanjima rada policijskih službenika od strane rukovodstva i jedinice za koordinaciju i usmjeravanje MUP-a TK, koji su nadzirali rad



Policijske stanice te partnerski odnosi sa zajednicom kroz realizaciju programskih ciljeva u oblasti rada policije u zajednici. Podignut je na jedan viši nivo što je rezultiralo većem povjerenju građana, a kao rezultat tog povjerenja su informacije koje dobijamo kao i podrška i pomoći u materijalno-tehničkom smislu. Naravno, kad se to pogleda po različitim segmentima kao što je javni red i mir, koji svake godine u posmatranom periodu nekih 5-6 godina se kreće u nekom rasponu od tridesetak prekršaja razlike. I ono što je karakteristično za narušavanje javnog reda i mira kao i prethodnih godina, pokazatelji govore, a informacije su koje policija ima, da se najviše narušavanja javnog reda i mira prezentuje kroz tuče, koje se uglavnom dešavaju znači izvan zatvorenih prostora. Najmanje tamo gdje su javni skupovi kojih je bio veliki broj ove godine i na kojima je evidentirano samo četiri takva narušavanja, naravno sa većim obimom gdje je učestvovalo tri i više lica. Kada je u pitanju kriminalitet, koji je posebno interesantan sa stanovišta, znači bezbjednosti građana gdje najveći izražaj ima i u krivičnim djelima protiv imovine. Znači, ovdje kao i prethodnih godina preko 70% krivičnih djela otpada na imovinu, u prvom redu krađe i teške krađe. U ovom izvještajnom periodu u 2012. godini u odnosu na prethodnu godinu, smanjen je broj krivičnih djela znatno kao i broj, što sam već rekao, saobraćajnih nezgoda. Naravno da ne možemo biti zadovoljni sa stanovišta broja tih događanja svakodnevno koja se vrše, kad je riječ i krivična djela i sa drugih segmenata, ali ovo su pokazatelji koji govore da mi idemo znači ka unaprjeđenju i povećanju bezbjednosti saobraćaja. To pokazuje i prvi mjesec ove godine gdje je smanjen i broj krivičnih djela, smanjen je broj saobraćajnih nezgoda i smanjen je broj narušavanja javnog reda i mira od 20-30%. Hvala.“

Učesnici u diskusiji su:

Dino Dedić:

„Prvo da vas sve pozdravim i da pohvalim rad policije, ali ima jedna stavka koja mi nije jasna. Tačka 10.9, znači citiram, – Poduzetim aktivnostima policije pronađeno je i oduzeto 4,27 grama, je li kilograma ili grama, a isto 4 grama kanabisa i 0,047 grama opojne droge i 1, 219 grama amfetamina. Dobro piše, utvrđeno 15 krivičnih djela u konzumiranju droge. To mi malo smeta, jer to je stvarno malo. Jedino me to zbunilo u ovom izvještaju jer smo poznati po tome.“

Esma Pašić:

„Poštovano radno predsjedništvo, cijenjeni načelnice, uvažene kolegice i kolege vijećnici, mediji i ostali gosti, sve vas srdačno pozdravljam u svoje lično ime i u ime Kluba vijećnika SDA. Kada je u pitanju Informacija o stanju bezbjednosti na području Policijske stanice Gračanica u 2012. godini Klub vijećnika SDA je zauzeo sljedeći stav.

Obzirom na uopšteno bezbjedonosno stanje u cjelokupnom okruženju, kada to kažem mislim na bezbjedonosnu situaciju u našoj državi, kada smo suočeni sa teškom ekonomskom, a pri tome i socijalnom situacijom, želim da istaknem sljedeće. Klub SDA uzima u obzir sve faktore koji utiču na bezbjedonosnu situaciju i probleme sa kojima se susreće Policijska stanica Gračanica, a to je nedostatak materijalnih sredstava, opreme itd., te zbog svega navedenog Klub SDA prihvata Informaciju o stanju bezbjednosti na području Policijske stanice Gračanica za period 2012. godine i nadamo se da ćemo u narednom periodu raditi svi zajedno na poboljšanju sigurnosti i bezbjednosti svih naših građana na području općine Gračanica.“

Zajim Nurić:

„Želim se osvrnuti na dio informacije koja tretira „javne skupove“. Na strani 11. ovog izvještaja piše: - U 2012. godini prijavljeno je i održano 230 javnih skupova na području općine Gračanica, a na istim je evidentirano narušavanje javnog reda i mira u 4 slučaja. Cijenim da su u broj 230 sadržani i predizborni skupovi održavani na teritoriji cijele općine. Moje pitanje za podnosioca Informacije glasi:

- Da li su u kvoti 4 – narušavanje javnog reda i mira na javnim skupovima obuhvaćeni i slučajevi narušavanja javnog reda i mira na predizbornim skupovima, odnosno na dan izbora u mjesnim zajednicama Lukavica, Stjepan Polje i Soko. Ako jesu, u kojoj fazi su eventualno sankcionisana lica koja su narušila javni red i mir i koje mjere su preduzete u vezi sa istim. Pitanje postavljam iz razloga što je narušavanje javnog reda i mira na javnim skupovima, naročito koji se

odnose na predizborne skupove, te na dan održavanja izbora „novijeg datuma“. U nekim ranijim godinama ovakve vrste narušavanja javnog reda i mira nije bilo, te smatram da je ova problematika trebala biti tretirana u većem obimu u navedenoj informaciji.“

Hasan Puškar:

„Ja imam nekoliko pitanja. Jedno se odnosi na, dokle se stiglo sa Odlukom o bezbjednosti saobraćaja, pošto znam da je bila njena izrada u toku? Drugo pitanje, je li se i ako jeste, šta je poduzeto sa krivičnim djelima koja su se dešavala na području MZ-e Soko jer ih je bilo bezbroj u 2012. godini i pomeni je počinitelac poznat? Znači to je jedno maloljetno lice. Znači šta je poduzimano, gdje je stalo jer isto je lice trenutno na slobodi i nastavlja sa izvršenjem krivičnih djela svaki dan. I jedna sugestija kolegi Nuriću, koliko ja znam na predizbornim skupovima u Sokolu nije bilo narušavanja javnog reda i mira. Ni na jednom skupu.“

Nurić Zajim je replicirao:

„Ja sam bio vrlo precizan. Govorio sam o javnim skupovima koji tretiraju predizborne skupove i dan održavanja izbora. Što znači, ja nisam rekao da je u Sokolu na predizbornom skupu, nego da je to kod vas konkretno na dan izbora. Ja sam u svojoj diskusiji bio vrlo precizan, a ti si to protumačio kako tebi odgovara.“

Edin Ibršević:

„I ja sam pročitao ovaj materijal i želim da pohvalim rad, prije svega saobraćajne policije, koja je spram mogućnosti vrlo uspješno obavljala svoje poslove u protekloj godini. Ali ono što mi je opet zaparalo pogled u ovom izvještaju to je, da ponovo nema ništa o prosjačenju kao vidu kriminala. U ovom slučaju čak i organizovanog, pa bih molio da mi nešto o tome malo više pojasnite. Toliko.“

Odgovore na pitanja i sugestije dao je komandir Policijske stanice Safet Ibrahimović:

„Malo droge, nije malo droge, ima droge malo više, samo je problem same organizacije i pristupa u otkrivanju izvršilaca, znači onih koji jednostavnim rječnikom rečeno dilaju drogu. Tu se preklapaju nadležnosti kako policijskih stanica, Ministarstva unutrašnjih poslova i Federalnog MUP-a. Svako iz svoje nadležnosti, veće obime kad je u pitanju druga, rade znači više instance na način kako to i zakon predviđa. Ovo što mi sa terena prikupljamo i dolazimo do saznanja, dostavljamo nadležnim službama u Ministarstvu koji cijene i vrše daljne istrage. Ova sitnija djela, naravno da ih ima i više ali zbog situacije u kojoj se i mi nalazimo, ima određen broj službenika koji treba da rade i da poznaju ovu problematiku. Ima i tehničkih problema, ima možda i neodvoljno rada za koji naravno Ministarstvo zahtijeva svakodnevno da se pojača. Nismo mi samo u Gračanici poznati po toj količini droge. Možda iz više razloga zato što smo u određenom periodu, evo sada načelnik Policijske uprave, tada komandir u to vrijeme kada se po prekršaju prijavljivalo za posjedovanje droge, mi smo se isticali u Federaciji i znači da smo imali najviše od tog perioda. Od tog perioda pa do danas je Gračanica poznata kao da samo u Gračanici ima najviše droge, što tvrdim da nije baš tačno. Kad su u pitanju javni skupovi, što se tiče predizbornih skupova i u vrijeme izbora. Sam predsjednik Izborne komisije rekao je da su izbori protekli u najboljem redu. Policija je bila prisutna na svim tim javnim skupovima, manje više, negdje možda nije adekvatno reagovala možda na vrijeme. A što se tiče Lukavice i Sokola, tu su podneseni zahtjevi za pokretanje prekršajnog postupka protiv izvršilaca, odnosno onih koji su narušavali javni red i mir. Kad je u pitanju Odluka o bezbjednosti saobraćaja to je u nadležnosti Općine da predloži Odluku. Doduše ja imam na inicijativu Ministarstva unutrašnjih poslova onog dana kada je došlo do izmjene Zakona o bezbjednosti saobraćaja i ispušteno je, ovako ili onako, kaznena odredba za nepropisno parkiranje po članu 73. i 84. tako da policija nije mogla da po pojedinim prekršajima postupa sa sankcijama. To je prepušteno nižim organima, što je i predvidio Zakon o osnovama bezbjednosti saobraćaja da entiteti, odnosno općine mogu donijeti sve one dijelove zakona koji nisu definisani državnim zakonom. Sa načelnikom sam nedavno razgovarao, pa ćemo i mi uputiti jedan svoj prijedlog iako mi ne predlažemo, ali možemo dati jednu konstrukciju te odluke jer Općina još uvijek nema općinske odluke o bezbjednosti saobraćaja po novom zakonu. Kada su u pitanju krivična djela koja

se odnose na MZ-u Soko tačno je da je u 2012. godini najizraženiji broj krivičnih djela, kad su u pitanju krađe i teške krađe, bilo je u Sokolu 2011. godine prijavljuje se jedno malodobno lice koji u kontinuitetu ulazi u porodične kuće i krađe novac i zlato. U 2012. godini on je bio u potpunosti aktivan tako da je do 25. 01. 2013. godine protiv tog lica donešeno 57 izvještaja Kantonalnom tužilaštvu. Dakle, skoro svako djelo koje je počinio, smatram da smo rasvijelili i dostavili nadležnom tužilaštvu. U tom smislu je 10. 12. 2012. godine Općinski sud u Gračanici donio odluku i presudu protiv ovog malodobnog lica da se upućuje u odgojno-popravni dom u KPZ Tuzla. On je upućen od strane ovog suda, bar sam takvu dobio informaciju telefonski od predsjednice Suda, ali zbog nedostatka prostora to lice je vraćeno dok prostora ne bude jer su to ograničeni prostori za malodobna lica. Radi se o šesnaestogodišnjaku koji je i nakon toga nastavio sa vršenjem krivičnih djela. Mi ga privodimo i dovodimo, ali u skladu sa zakonskim odredbama prema maloljetnicima uvijek mora biti prisutan ili socijalni radnik ili neko od roditelja i mi ga nakon završenih uslova privođenja puštamo na slobodu, a on nastavlja sa vršenjem krivičnih djela. Danas sam ponovo razgovarao sa predsjednicom Suda, i ona je kontaktirala odgojno-popravni dom i to zamjenika direktora, koji je obećao da će pokušati da nađu načina da ovo lice smjeste, ali ono što žulja nas, a i mnoge druge, kažu niste vi jedini na ovom kantonu koji imaju taj problem. Što se tiče prosjačenja, tačno je da nemamo izvještaja o počinjenim krivičnim djelima kad je u pitanju prosjačenje. Imamo kad su u pitanju prekršaji i mi povremeno vršimo privođenje takvih lica. Međutim, efekat je slab. I kada ga dovedemo pred sud, sud odredi kaznu za takva lica, a takva lica neće platiti, nemaju odakle i znači oni se odmah puštaju na slobodu. Tu imamo problem ne samo sa njima nego i sa niz drugih kriminalno aktivnih lica ili lica koja stalno narušavaju javni red i mir i koji ne žele da plate kaznu, ali zatvora za njih nema, mehanizma za rješavanje u tom dijelu. A što se tiče nas, mi intervenišemo i ima se u vidu ova vaša primjedba, na kojoj ćemo mi naravno ove godine malo više poraditi.“

Hasan Puškar:

„Samo jedno pitanje. Jeste li vi tražili mjeru pritvora, pošto je to višestruki počinilac. Jeste li kao Policijska stanica tražili mjeru pritvora, ako jeste od koga, pa da se mi obratimo nekom drugom u vezi pomenutog lica jer je 54 prijavljena, a ima još 100 neprijavljenih samo u Sokolu za to lice. A to lice je činilo krivična djela i na čitavom području općine. Druga stvar, za prosjačenje ja mislim da smo mi svi krivi ovdje, jer svi mi damo marku-dvije. Niko neće od nas biti svjedok da to dijete prosjači i da ga prijavi policiji. Niko od nas neće svjedočiti i reći, ja sam vidio, dovezao ga taj i taj kombi, jer bi možda trebali to mi kao građani općine Gračanica malo svoju svijest tu da poboljšamo. Nijedan od nas neće otići na sud i reći to, odnosno potvrditi, a svi kažemo policija ne radi. Oni ne mogu bez svjedoka ništa učiniti. Molio bih da mi se odgovori na pitanje da znam od koga sljedećeg da tražim odgovor, ako ste tražili mjeru pritvora za ovo lice.“

Sjednici je pristupio i Selimović Senad pa je prisutno 30 članova Vijeća.

Za riječ se javio načelnik Policijske uprave Gračanica Omer Halilčević te iznio sljedeće:

„Dame i gospodo, evo želim prije svega da vas pozdravim, nisam imao prilike da vam poželim uspješan rad u ovom sazivu, a mi kroz ova pitanja dolazimo na iste odgovore koje sam ja otprilike prošle godine u isto vrijeme dao. Zakon o prekršajima ne poznaje kaznu zatvora. Sud izrekne novčanu kaznu, od prosjaka naravno ona je nenaplativa i dođemo u poziciju da radimo posao koji nema smisla. Ja sam nekad u januaru prošle godine dao zadaće da se snimi stanje vezano za prosjačenje na području općine Gračanica, da se identifikuju lica, da se u tom pravcu sačini informacija i dostavi Centru za socijalni rad, da oni sa svoje strane poduzmu mjere. I to je otprilike urađeno, mi broj prekršaja imamo, a nije ni važan, veći je za prošlu godinu, da se vidi da smo po tom nešto radili. Ali mislim da je interesantnije identifikovati ta lica i uključiti druge subjekte koji su odgovorni za ovaj dio, da se tim licima pomogne, da se ta djeca ne zlostavljaju itd. A ovi što prosjače, evo Hasan reče i mi smo krivi, ne treba takvima davati jer onaj ko je za pomoć za sadaku zna se kako se to radi, a ne na čaršiji. Kada je u pitanju dio koji se odnosi na maloljetno lice sa područja MZ-e Soko komandir je iznio ove statističke podatke kojih je zaista puno. Sud je izrekao odgovarajuću mjeru, upućivanje u kazneno popravnu ustanovu. Mi dostavljamo izvještaje, jednom ili dva puta, mislim mi smo vodili to lice, kad nama pređe mjera pa u jednom danu izvrši 2-

3 krivična djela, odvedemo do tužioca. Kad nađu u sistemu da ima osobu, kaže nema smisla pritvor jer je već izrečena mjera upućivanja u kazneno-popravni dom. Iz tog razloga, nama ti izvještaji koje dostavljamo prema tom licu, znači odbacuje jer kaže, ima već i nema ga smisla voditi. To je zakonska regulativa i to je tako kako jeste. Kada je u pitanju narkomanija, to je gospodin Dedić pitao ako sam dobro zapamtio, Policijska stanica Gračanica duži vremenski period u tom pravcu postiže i dobre rezultate. A ono kako ja vidim izraženost narkomanije na području, ja ću reći sada, ja nisam zadovoljan. Mislim da bi trebalo biti daleko veći broj i krivičnih djela i posjedovanja i uživanja opojnih droga i proizvodnje i prometa opojnih droga. To su ta dva krivična djela ali imamo problem sa otkrivanjem, dokazivanjem itd. Ja imam uporedne podatke šta je Ministarstvo uradilo po svim segmentima, naravno i šta je to Policijska stanica, odnosno službenici koji rade u Policijskoj upravi, a odgovorni su za stanje bezbjednosti na području općine Gračanica. Otprilike, po narkomaniji je negdje između 6 i 7% i po jednom i po drugom krivičnom djelu. Znamo da Ministarstvo, u sjedištu znači gdje postoji specijalizovano odjeljenje koje radi samo taj dio posla, otprilike više od polovine tih djela otkrije i kad se to uporedi onda ono što su uradili službenici u Gračanici trebamo biti zadovoljni. Ponavljam, s obzirom na izraženost problematike, ne samo u Gračanici nego uopće u državi da budem precizniji, trebalo bi tih djela biti više. Ja tražim od službenika da se u tom pravcu više trude i naprave rezultate, a s ovim da smo mala Kolumbija ipak se ne bih složio.“

Hasan Puškar:

„Ne dobih ja konkretan odgovor na svoje pitanje. Znači po vašem, Tužilaštvu je predlagana mjera pritvora. Molio bih da se sad ovdje usvoji inicijativa ili zaključak da Tužilaštvo podnese izvještaj, jer je ovo više nepodnošljivo. Svaki dan to lice vrši krivična djela u Sokolu. Sinoć je ukrao 2.000,00 KM, prekjuče ukrao, jutros, svaki dan. Pošto je policija nemoćna da izrekne mjeru pritvora, molio bih da Općinsko vijeće zatraži od Tužilaštva informaciju, a što se tiče narkotika vjerovatno se može bolje. Ima mogućnosti, znam iz iskustva, taj sam posao radio i po meni je malo 14 otkrivenih djela za narkomaniju u 2012. godini. To se definitivno može pomnožiti sa više, to treba malo više raditi i to tvrdim odgovorno.“

Prešlo se na izjašnjavanje o Informaciji ali Puškar je ponovo tražio da se formuliše zaključak. Odgovor u vezi s tim dao je ponovo Safet Ibrahimović.

Predsjedavajući Vijeća je dao na izjašnjavanje Informaciju o stanju bezbjednosti na području Policijske stanice Gračanica za 2012. godinu uz stav da se urgira i u što kraćem roku omogućiti smještaj malodobnog lica u odgovarajuću ustanovu.

Informacija je usvojena jednoglasno sa 30 glasova „ZA“.

Data je pauza od deset minuta.

Nastavku sjednice prisustvuje svih 30 članova Općinskog vijeća.

## **TAČKA 5:**

### **INFORMACIJA O IMPLEMENTACIJI STRATEGIJE ZA MLADE OPĆINE GRAČANICA 2010. – 2012. GODINE**

Uvodno obrazloženje po ovoj tački dnevnog reda dao Mirza Hodžić, savjetnik za mlade pri kabinetu Općinskog načelnika.

„Dame i gospodo, uvaženi vijećnici, gospodine načelniče, dragi gosti i mediji.

Strategija za mlade, usvojena 2010 godine na martovskoj sjednici OV-a Gračanica predstavlja jedan od ključnih dokumenata za razvoj omladinskog sektora na prostoru Općine Gračanica. U vremenu prije formalno pravnog usvajanja Strategije, Općina Gračanica je vodila brigu o mladima kroz razne sektorske politike i strategije koje su bile usmjerene na rješavanje problema svih građana, pa tako i mladih unutar određenog sektora ili oblasti. Međutim, kako je

vrijeme odmicalo postajalo je sve jasnije da se sa specifičnim problemima mladih nije moguće boriti samo putem razvoja sektorskih politika, naprotiv stvorila se potreba za omladinskom strategijom koncipiranom kao dokument koji bi identificirao specifične probleme mladih i definirao mjere i aktivnosti koji bi pomogli otklanjanju navedenih problema.

Danas se nalazimo na samom kraju implementacije prve omladinske strategije Općine Grčanica u postratnom periodu i ovo je vrijeme kada je posebno sumirati rezultate rada lokalne uprave i nevladinog sektora na implementaciji iste. Strategija za mlade je, na osnovu istraživanja o položaju mladih, identificirala 51 problem za koje su mladi koji žive na prostoru Općine Gračanica jasno kazali da predstavljaju ključne prepreke za njihov razvoj. Specifičnost navedenog istraživanja i identificiranih problema i jeste u tome da su ih definirali mladi koji su učestvovali u popunjavanju upitnika, te mladi koji su radili na izradi same Strategije za mlade. Tokom trogodišnje implementacije strategije djelomično ili u potpunosti lokalna uprava u saradnji sa domaćim omladinskim udruženjima, stranim organizacijama, mjesnim zajednicama i građanima je uspjela od 51. definiranog problema mladih riješiti njih 36, što procentualno iznosi oko 70% od ukupnog broja definiranih problema. Pa tako možemo reći da je uspješno je oformljen Omladinski centar koji na godišnjem nivou sprovodi niz aktivnosti kako bi kreativno intelektualne vještine mladih došle do izražaja, svaka omladinska organizacija na području općine posjeduje prostor za rad koji je dodijeljen od strane MZ ili Općine. Nadalje, OV je u augustu 2010 usvojilo Odluku o načinu utroška sredstava za projekte mladih, u upravi općine postoji službenik za mlade, 6 omladinskih organizacija u MZ Stjepan polje, Gračanica, Babići, Džakule, D. Orahovica i Škahovica aktivno djeluje na prostoru Općine, 2 nove u MZ Pribava i MZ Soko su u fazi formiranja, u 2011. godini na Javni poziv za projekte mladih u Općini Gračanica pristiglo je 14 projektnih prijedloga od kojih je njih 8 odobreno za sufinansiranje, u 2012 godini ponovno imamo 14 pristiglih aplikacija od kojih je njih 7 odabrano za sufinansiranje. Općina Gračanica je u proteklom periodu inicirala, pokrenula, potpomogla, učestvovala kao partner, sufinansirala ili finansirala, 26 projekata koji su direktno usmjereni na rješavanje problema mladih identificiranih Strategijom. Navedeni projekti su koncipirani na način da potiču omladinski aktivizam i volonterstvo, promiču kulturno izražavanje i bavljenje rekreativnim sportom, proaktivno djeluju na zdravstveno higijenske navike i očuvanje zdravlja mladih, preventivno djeluju na upotrebu opojnih sredstava, potiču interes mladih za neformalnim obrazovanjem, potiču mlade da postanu društveno aktivni građani, promovišu i prakticiraju rodnu ravnopravnost, aktivno utječu na prevenciju maloljetničke delikvencije, itd. Osnovna karakteristika navedenih projekata je izražena kroz učešće mladih u pripremi i implementaciji projektnih aktivnosti, što umnogome doprinosi razvoju i povećanju nivoa društvene odgovornosti mladih. Bitno je naglasiti da tokom trogodišnje implementacije navedenih projekata oko 13000 mladih je direktno učestvovalo u kreiranju aktivnosti ili prisustvovalo (imalo koristi) od projektnih aktivnosti; organizirano je preko 100 seminara, treninga, edukacija za mlade o raznim temama počevši od seksualnog i reproduktivnog zdravlja, zloupotrebe opojnih sredstava, načina pisanja biografije, ponašanja prilikom intervjua za posao, liderstva među mladima, samozapošljavanja, maloljetničke delikvencije, itd. Bitno je napomenuti da je Općina Gračanica u BiH postala sinonim kako treba razvijati omladinsku politiku na lokalnom nivou, te je plan općinske uprave takav rejting uz pomoć omladinskih udruženja, javnih ustanova i institucija, i u narednom periodu održati. Prioriteti Općine Gračanica u kontekstu razvoja omladinske politike u narednom periodu podrazumijevat će: Jačanje i umrežavanje omladinskih organizacija koje djeluju na prostoru Općine Gračanica (formiranje vijeća mladih), nastavak razvoja saradnje sa međunarodnim i regionalnim omladinskim organizacijama, promocija omladinskog aktivizma, jačanje kapaciteta svih omladinskih organizacija i formiranje novih. Raduje činjenica da je budžet za mlade u 2013 godini i pored ekonomske krize koja je zahvatila čitav svijet umanjen za samo 10000 u odnosu na 2012, što još jednom dokazuje činjenicu da su zakonodavna i izvršna vlast u Gračanici opredijeljeni za daljnji razvoj omladinskog sektora u Općini Gračanica.

Ovom prilikom bih u svoje, u ime općinskog načelnika, članova općinskog vijeća i kompletne lokalne uprave, koji su zdušno potpomogli implementaciju gore navedenih aktivnosti, želio iskazati zahvalnost omladinskim organizacijama kao što su: ANEA-MG, Udruženje mladih Sijedi krš Babići, Udruženje Izvor iz Škahovice, Udruženje mladi Džakula iz Džakula, Omladinski kulturni centar „Stjepan Polje“ i Udruženje mladih „Velika djeca“ iz D. Orahovice zbog toga što su

predanim radom i zalagnjem omogućili da se u Općini Gračanica omladinska politika implementira na takav način da direktno ima utjecaja na položaj mladih. Također bih ovom prilikom spomenuo i organizacije kao Institut za razvoj mladih KULT iz Sarajeva, Njemačku vladinu organizaciju za internacionalnu saradnju GIZ, projekat GAP, Tuzlansku Fondaciju, Biro za ljudska prava Tuzla, Udruženje mladih Kult iz Gradačca i Omladinski hostel iz Vlasenice na svesrdnoj potpori koju su pružili tokom razvoja omladinske politike u Gračanici. Hvala.“

Učesnici u diskusiji su:

Rahim Gadžić:

„Kako je savjetnik za mlade Općinskog načelnika dao iscrpno obrazloženje ja bih rekao da je Informacija urađena dobro. Ali imam jednu primjedbu vezano za projekte koji se realizuju iz budžeta za mlade. Znajući da se oni realizuju i oglašavaju putem Radio-Gračanice, mi znamo svi da Radio-Gračanica ne pokriva sve MZ-e. Ja sam u nekoliko navrata bio kod savjetnika za mlade i upozoravao ga da bilo koji projekat za koji trebaju aplicirati mladi, za sredstva iz budžeta Općine Gračanica, da trebaju obavijesti u svim MZ-a, da se oglasi. Samim tim omogućit ćemo svim omladinskim organizacijama koji su zainteresovane da apliciraju iz budžeta za mlade. Ako to ne uradimo znači mi ćemo ograničiti ko to od mladih organizacija može aplicirati za te projekte. Zato ubuduće molim da se u 2013. godine ne ponavlja greška kad je u pitanju oglašavanje projekata koji će se realizovati iz budžeta za mlade, obavezno da se oglasi u svim MZ-a, da svi mogu aplicirati za ta sredstva.“

Mirsad Čamdžić:

„Samo da kažem da je ovo Mirza odlično pripremio u odnosu na ono što smo prije imali i kako je sve bilo nesređeno. Ovo je ipak jedan sistematizovan rad, da pohvalim sve ovo što je iznio i naravno da će ovaj Izvještaj dobiti našu podršku. Čestitam.“

Nije bilo više učesnika u diskusiji i Informacija o implementaciji Strategije za mlade Općine Gračanica 2010.-2012. godine, usvojena je ednoglasno sa 30 glasova „ZA“.

## **TAČKA 6:**

### INFORMACIJA O PROSTORNOM PLANU OPĆINE GRAČANICA

Nije bilo potrebe za dodatnim obrazloženjem, a učesnici u diskusiji po tački 6. dnevnog reda su:

Mirza Omerdić:

„Evo javio sam se u vezi ovog Prostornog plana. Pokušao sa ga ovako iščitavati da vidim nekakvu logiku pa sam došao do toga da je evo Općina Gračanica poslala na usaglašavanje Skupštini TK Prostorni plan. Skupština TK je to prosljedila Kantonalnom ministarstvu, a Kantonalno ministarstvo je dalo svoje mišljenje da nije usaglašeno uz zahtjev da se prema Federalnom ministarstvu uputi zahtjev za tumačenje ovog člana 49. stav 3. E sad mi nije jasno, pošto sam shvatio da je ovdje osnovni problem prenamjena poljoprivrednog u ovo, sve instance počev znači od TK pa do Federalnog su odbile. Šta se uopšte može u daljoj inicijativi u tom smislu uraditi kad oni uporno to odbijaju. Koja inicijativa od strane Općine može promijeniti takav stav. Čisto znači, da nam pojasnite na koji način se može boriti da se promijene sva ova gledišta i stajališta i Kantonalnog ministarstva za prostorno uređenje i Federalnog ministarstva. Na koji način će se to riješiti meni nije jasno, pa evo ukoliko neko ima da mi to malo pojasni.“

Rahim Gadžić:

„Ministarstvo je tražilo mišljenje od Federalnog ministarstva poljoprivrede, vodoprivrede i šumarstva i dobijanje navedene saglasnosti Federalnog ministarstva poljoprivrede, vodoprivrede i šumarstva, stekli su se uslovi u davanju saglasnosti na Prostorni plan Općine Gračanica od Skupštine TK. I dopis je upućen Općini Gračanica, Općinskom načelniku pod brojem: 12/05-23-29240/011 od 04. 10. 2011. godine. Ovim aktom vidimo da je Federalno ministarstvo dalo svoju

saglasnost da se može dati saglasnost, kako sam ja ovdje mogao shvatiti kad sam iščitao. Da li je to u pitanju da se može dobiti saglasnost na Prostorni plan ili ne može. Ako ne može onda evo ovo što je Mirza rekao, jer naši građani i dan danas imaju stalne poteškoće da li se može ili ne i da ovo Općinsko vijeće pokuša razriješiti taj problem, zbog čega je u ovakvom stanju Prostorni plan Općine Gračanica.“

Odgovore je dala Aida Hodžić, šef Službe za upravu:

„Ja samo mislila da nije potrebno da iznosim uvod oko ove informacije zato što sam očekivala pitanja. Čitava Informacija je trebala da da jedan odgovor na prilično zbunjujuću situaciju u vezi sa Prostornim planom Općine Gračanica koji je izrađen, usvojen od strane Općinskog vijeća i nikad nije dobio saglasnost na primjenu i zato se ne primjenjuje. Ja ću odgovoriti na pitanja koja ste postavili. Postoje dva načina da se riješi ova situacija. Ovaj Izvještaj je trebao ustvari da ukaže na ono šta je problem i mislim da je i ukazao jer ste odmah prepoznali. Problem su površine koje se smatraju po Prostornom planu TK poljoprivrednim, a po Prostornom planu Općine Gračanica urbanim i građevinskim zemljištem koje se odnosi na MZ-e Stjepan Polje, Donja Lohinja i Donja Orahovica i to uz magistralni put Doboj-Tuzla, gledano prema Tuzli sa desne strane. I svo vrijeme priča se vodi oko tih površina. Uz to Ministarstvo pronade formalno pravne razloge da kaže da nešto u tekstu plana nije urađeno sa određenom uredbom. Zakoni su se mijenjali, paralelno se radio Prostorni plan Općine Gračanica i Prostorni plan TK. Prostorni plan TK je rađen od 1999. do 2006. godine kada je usvojen i objavljen u „Službenim novinama Kantona“. U Informaciji već imate naznačeno da 2005. godine, kada je Općina tražila saglasnost na Plan, obustavljeno je izdavanje te saglasnosti zato što nije donesen Prostorni plan Kantona. To je bio razlog. Poslije toga, čim je donesen mi smo poslali Plan na davanje saglasnosti, međutim odgovor je bio, e sad nije urađen po novoj metodologiji koja se zove Uredba o jedinstvenoj metodologiji za izradu dokumenata prostornog uređenja koji je zahtijevao analognu i digitalnu formu. Analogna forma to je knjiga sa svim kartama, u digitalnom mediju da mora biti za računare. Pa smo onda išli da taj plan preradimo što svaki put traži nova izdvajanja i ponovne javne nabavke i ugovore, pa smo tu uradili. Pa smo opet Plan poslali 2011. godine na usaglašavanje, svo vrijeme uz dogovor sa Ministarstvom. Nikada nisu rekli, mi nećemo dati saglasnost za sporne površine. Međutim, Zakon o poljoprivrednom zemljištu FBiH rekao je da se mora tražiti saglasnost od Skupštine Kantona, a ovaj zadnji papir je ustvari mišljenje Federalnog ministarstva koje je dato Kantonalnom, da ne daje Federalno ministarstvo poljoprivrede saglasnost na Prostorni plan Općine Gračanica, samo na kantonalni. Zato se Općina Gračanica obratila Skupštini TK i obratila se normalno Ministarstvu. Skupština TK je opet taj dopis prosljedila Ministarstvu tako da je Ministarstvo imalo dva puta da da mišljenje, jednom Skupštini, jednom Općini. Mišljenja su slična, nisu nam dali saglasnost, nisu usaglašene površine, nije u GIS-u, treba opet doradit i mi to opet doradujemo. I predat ćemo opet taj plan na usaglašavanje, ali ja i dalje ne znam da li će on biti prihvaćen, upravo zbog ovih spornih površina. Ono što je bitno istaći, da je Općina Gračanica kad je donešen Prostorni plan TK u svim javnim raspravama, u svim dokumentima koji su otišli i Općine Gračanica, tražila da se te sporne površine uvrste u Prostorni plan TK, međutim svaki puta te naše primjedbe nisu usvojene. Gospodin Hasan Fehratović je bio predsjedavajući Općinskog vijeća kad smo zajedno i u ime Općinskog vijeća išli na razgovor u Ministarstvo, međutim nije se moglo. Dakle, bila je prilika sad, kad je u toku prošle godine se raspravljalo o stanju prostora u TK i o stanju potrebe da se mijenja plan, Prostorni plan TK, da se pristupi izmjenama tog plana i da se uvrste ove primjedbe. Slične primjedbe imaju i druge općine, nije to samo slučaj sa Općinom Gračanica. Ja konkretno znam za Gradačac. Međutim, Vlada i Skupština su donijele zaključak da se prihvatila ta ocjena stanja u prostoru i da se neće ći u izmjene Prostornog plana Kantona i da se traži od svih općina da donesu svoje prostorne planove. Dakle, tu smo mogućnost ispustili i sad moramo naš plan dalje raditi da što prije dobijemo saglasnost na njega. Kad se to procentualno izrazi to uopšte nisu velike površine. Ja mislim da se može primijeniti što i stoji u Informaciji, primijeniti član koji kaže neke male neusaglašenosti ili nešto slično, ali indikativno je i to da samo Općina Gračanica pokušava da dobije saglasnost da ni jedna općina još nije ni podnijela zahtjev za davanje saglasnosti. A mi imamo u Zakonu o prostornom uređenju gdje kažu do juna ili avgusta 2013. godine ko ne usvoji neće moći izdavati prostorno plansku dokumentaciju. Neće moći izdavati urbanističke saglasnosti. Imamo i takvu

odredbu u Zakonu. Dakle, bila je nemogućnost da se izmijeni Prostorni plan TK, ali usvojeno je već da to ne ide i sad nam ostaje da opet na ovaj naš plan pokušamo pribaviti saglasnost. Da vam bude jasno zašto moramo pribaviti saglasnost, razlog je što je Ministarstvo prostornog uređenja drugostepeni organ u svim postupcima koje vodi Služba za prostorno uređenje i ako ne daju saglasnost, sva nam rješenja i urbanističke mogu padati i mogu ih poništavati po pravu nadzora. Zato i moramo tražiti saglasnost i moramo je imati. Mislim da sam dala odgovor i na jedno i na drugo pitanje koja su postavljena.“

Za riječ se javio ponovo Rahim Gadžić:

„Ja kako sam shvatio šeficu Službe, mi ako Prostorni plan do polovine 2013. godine ne usaglasimo, da ćemo imati velikih poteškoća za naše građana kad su u pitanju izdavanja građevinskih dozvola. Ali mi smo konkretno pitali, šta mi kao zakonodavna vlast u Općini Gračanica možemo pomoći da se to pokuša razriješiti. Mi stojimo na raspolaganju da pomognemo našim građanima da se uklone barijere kad je u pitanju dobivanje građevinske dozvole. Mi znamo svi da je jako komplikovano i kad nema tih barijera doći do dokumentacije za gradnju, puno se toga traži i još sad kad imamo i ovo kako će naši poduzetnici koji žele graditi u tim područjima kad znaju da ih unaprijed čekaju poteškoće da to dobiju. Zato molimo šeficu da kaže nama kao zakonodavnoj vlasti šta mi možemo pomoći da se to razriješiti.“

Aida Hodžić:

„Nisam sigurna da imam odgovor na Vaše pitanje iz razloga što je Općinsko vijeće Gračanica više puta upućivalo inicijativu za izmjenu Prostornog plana TK i za dobijanje saglasnosti. Samo Vas mogu obavijestiti da su trenutno u toku izmjene i dopune Zakona o prostornom uređenju i građenju TK, da je nacrt usvojila Vlada TK, ne znam da li je bila Skupština i je li dalje razmatran i da će doći vjerovatno i Općini Gračanica i Općinskom vijeću na razmatranje i da u okviru toga se može dati primjedba i podnijeti još sve ono što bi nam otežalo situaciju, da pokušamo popraviti. Zakon je prilično rigorozan, što se tiče prostornog planiranja. Dao je velika ovlaštenja Ministarstvu, a malo općinama, mada je Zakonom o lokalnoj samoupravi, prostorno planiranje isključiva nadležnost općinskih organa uprave. Usaglašenost mora postojati između planova višeg i nižeg reda, to je normalno i uobičajeno. Ali to se mora odnositi na one zajedničke infrastrukturne projekte i velike projekte. Ne možemo mi izmještatati trasu magistralnog puta, ako je Kanton utvrdio gdje će biti. Možemo reći da se pomjeri, ali moramo to preuzeti u svoj plan. I to je razlog što mora postojati vertikalna usaglašenost. Ali ovo nije nešto što se konkretno tiče cijelog tuzlanskog kantona, nego samo Općine Gračanica. Ova naša planirana urbana područja ne ugrožavaju postavke Prostornog plana TK, ni u kom slučaju.“

Općinski načelnik Nusret Helić je takođe iznio neka obavještenja u vezi ove tačke dnevnog reda:

„Istrajat ćemo mi u ovome da se da saglasnost na Prostorni plan Općine Gračanica. Dvije su mogućnosti. Mi nećemo tu prvu. Prva je mogućnost da odustanemo od onog poljoprivrednog zemljišta i planova koje smo mi donijeli (urbani red, sjećate se, Stjepan Polje, Donja Lohinja i Donja Orahovica). Ali smo evo pripremili i radimo jednu verziju i vjerujte da je samo u pitanju neko ko ne živi u stvarnosti. Ne može se planirati građevinska, urbana industrijska zona u Prijekom Brdu kad je ona po prirodi dole smještena gdje jeste. Tako da, vjerujte da ćemo istrajati, a imamo i obećanja nekih u Ministarstvu, nažalost neki ministri koji su gore nisu se dovoljno upustili u stvarnost i realnost Gračanice. Ja mislim da ćemo mi u prvoj polovini 2013. godine dobiti saglasnost na naš Prostorni plan.“

Predsjedavajući Vijeća je dao na izjašnjavanje Informaciju o Prostornom planu Općine Gračanica i ista je usvojena jednoglasno sa 30 glasova „ZA“.



## **TAČKA 7:**

### INFORMACIJA O UPRAVNOM RJEŠAVANJU PREDMETA U SLUŽBAMA ZA UPRAVU OPĆINE GRAČANICA U 2012. GODINI

Nije bilo učesnika u diskusiji i Informacija o upravnom rješavanju predmeta u službama za upravu Općine Gračanica u 2012. godini je usvojena jednoglasno sa 30 glasova „ZA“.

## **TAČKA 8:**

### RJEŠENJA I ZAKLJUČCI IMOVINSKO-PRAVNE SLUŽBE

Aida Hodžić, šef Službe za prostorno uređenje, geodetske i imovinsko-pravne poslove smatrala je za potrebnim da iznese određeno obrazloženje u vezi rješenja o dodjeli zemljišta d.o.o. „Bosna“ Gračanica.

„Samo da pojasnim ovo rješenje, imam potrebu zato što se o lokaciji robne kuće dosta diskutovalo. Dakle, mi smo pokušavali u toku izrade ovog rješenja i usaglašavanja stavova da ostvarimo kontakte sa preduzećem „Bosna“ i da napravimo dogovor da se taj prostor otkupi i da se napravi trg na tom mjestu. Međutim, nismo naišli na razumijevanje i mogućnost saradnje sa predstavnicima d.o.o. „Bosna“. Nisu bili raspoloženi za takvu opciju što se tiče zakonitosti. Po izmjenama i dopunama Regulacionog plana „Centar“ koji je na snazi, donesena je urbanistička saglasnost i ona je još uvijek pravosnažna i na osnovu nje se pristupilo izradi ovog rješenja o dodjeli zemljišta.“

Učesnici u diskusiji su:

Dino Dedić:

„Ja mislim naravno da je bolje napraviti posao nego trg i mislim da mnogo košta ovo što treba da se plati i da je vrijeme kratko. Ako ste u mogućnosti da im produžite, mislim da bi to bilo idealno jer će se dobiti nova radna mjesta, tako da ćemo zaposliti neke naše ljude.“

Rahim Gadžić:

„Ja bih samo postavio jedno pitanje, jer smo otvorili diskusiju vezano za rentu koju treba da uplati preduzeće „Bosna“. Da li će se iz ovog iznosa odbiti iznos koji je uplaćen prije dok je postojao objekat robne kuće u centru grada. Ovo pitam kako se ne bi duplao iznos rente, jer je objekat postojao i u ratu oštećen i srušen. Ovo pitam jer ja u svom vijećničkom iskustvu nisam do sada vidio ovako veliki iznos rente.“

Odgovor je dala Aida Hodžić, nakon čega je rješenje usvojeno jednoglasno sa 30 glasova „ZA“.

Drugo rješenje i zaključak Imovinsko-pravne službe usvojeni su jednoglasno bez diskusija, sa 30 glasova „ZA“.

Sjednica je završena u 14.15 sati.

Zapisnik vodila: Mevlida Naimkadić

Tonski snimak sjednice uredno je arhiviran.

Mevlida Naimkadić

PREDSJEDAVAJUĆI  
OPĆINSKOG VIJEĆA

Edin Ibrišević